

Le **dotur Eduard Agreiter é demez** en jöbia domisdé y en vëndres, ai 10 y 11 de merz, y vëgn sostituì dala doturia Mahlknecht 349 06 67 034.

Aldiënza dla **defensuria zivila** en vëndres 11/03: 14.30-16.00 a S. Martin te comun.

Por la stampa dl program **manifestaziuns por aisciöda/isté** preibel comuniche les manifestaziuns cina ai 10 de merz a www.manif.it o al Sorvisc Formaziun

PLOANIES SAN MARTIN Y LUNGIARÜ

Al foss dër bel sce i jogn y les jones che é stá a confermé l'ann passé y ince i agn denant toless sò chësc invit y gniss ince motivá dai geniturs:

Os jogn, gnide a odèi na Dlijia jona, via y plëna d'entusiasm pro la **gran festa di jogn a Salzburg da Pasca de Ma!** Cun d'atri 6-7.000 jogn vëgnel festejé le Spirit Sant cun cianties, musical, de beles catecheses, mëssa, adoraziun, workshops y divertimënt.

Al pëia ia na coriera dala Val Badia ai 13 de ma incër les 12.30 a La Ila y röia indò a ciasa ai 16 de ma incër les 20.00. Al vëgn dormí te scores te sac da polan. Inviá é jogn dai 12 agn insö. Le cost é de ca. 115 euro. Info: www.loretto.at/event/pfingsten16

Important: dan la prenotaziun online, scriede na e-mail a renate@valentini.cc y ara ves ortiará dötes les informaziuns por se prenoté!!

Curs de preparaziun al maridé: le Sorvisc ai Jogn Val Badia lascia alsavèi che pro le curs, che vëgn tigní dal 1 ai 3 d'auri a La Ila tl zënter dla jonëza SaJ, él ciamó en valgügn posé a desposiziun. Les iscriziuns cina ai 24 de merz por tel. 0474 523 070.

En sabeda, ai 12 de merz, **Staziuns dla Schira Jonila y di Sorvidus.** I s'incuntun dales 14.45 a Badia (dan colonia) por jí sò Oies a Mëssa dales 16.00. Dedò pice bufé.

La Uniun dles Ères Catoliches inviëia (prenot. Kath. Frauenbew. Bz 0471 972 397) - a n **peregrinaje a Roma cun tapes a pe** cun n'incuntada cun le Papa, dai 28 de jügn ai 2 de messé. Al é da s'anunzié dai 9 de merz dales 8.00 inant (ma püc posé).

- a n **peregrinaje a Roma cun le bus** dai 30 de jügn ai 2 de messé. Al é da s'anunzié dai 9 de merz dales 8.00 inant.

- a n **peregrinaje a Assisi** sot al tema "Sciöche Dî a me, insciö iö a te" dai 5 ai 8 d'auri, cun l'acompagnamënt de Luis Gurndin. Al é ciamó val' posé lëdi, s'anunzié atira.

En sabeda sëra y en domënia do mëssa, ai 12 y 13 de merz, gnarál venü a San Martin, Lungiarü y Antermëia **primules y violes por la Krebshilfe.** Dilan damperfora de osc contribut. (Organisé dala Uniun dles Patrones y les Ères dla SVP).

Les **iscriziuns tla Scora de musiga** por l'ann de scora 2016/2017 vëgn tutes sò tratan döt le mëis de merz. I formulars ciafon tl secretariat dla Scora de musiga a La Ila o te internet (sot a www.musikschule.it). Por informaziuns telefonede 0471 847 748.

Dai 25 de messé ai 21 d'agost gnarál metü a jí n workshop, olache **mituns y jogn dai 9 ai 14 agn dla Val Badia imparará ite n musical** cun les referëntes Sofia Pisching (direziun musicala), Barbara Rottensteiner Comploi (reja, coreografia), Maria Frenner (scenografia y costüms) y Stefanie Kaneider (coordinaziun, cor). Informaziuns plü avisa pro Sorvisc ai Jogn Val Badia www.jogn.org. Iscriziuns online dai 07 ai 18 de merz sot a www.proiec.org.

Jita/peregrinaje tl "**Alto Lazio**" ai 18-21 d'auri. Info y prenot. 335 61 16 528 o por mail: info@taxvico.it cina ai 15 de merz.

Portina por l'assistënza y la cura é daverta lönesc, dedemesaledema y vëndres: 14.00 - 16.00 y dedolönesc y jöbia: 10.00 - 12.00 tl Raiun Sozio-sanitar a Picolin tla pröma alzada. Info 0474/586137 tratan chësc orar.



www.unitepastorala.org

Plata dles Ploanies San Martin y Lungiarü

siur **Iaco Ploner** 333 48 32 765 / 0474 453 003 - ploner.jakob@aruba.it
redaziun: anton.gasser@rolmail.net - 348 27 44 517 / 0474 523 194

06.03. - 13.03.16 nr. 15

termo da publiché: jöbia 20.00
radio: 90,40 / 93,70

4^a DOMËNIA DE CARSËMA C

Vangele do Lüca 15,1-3.11-32

I ô pié ia y jì da mi pere y ti dî:
Pere, i á fat picé cuntra le cil y cuntra tè.

I ne sun nia plü dëgn de ester to fi;
tòleme sò sciöche un de tû oras.

Spo él pié ia y é jü da so pere.

Le pere l'â bele odü gnon dalunc adalerch,
y s'al menâ picé.

Dlun saltan ti él jü adincuntra,
ti é salté incër le col y l'â bajè.

Y le fi á dît:

Pere, i á fat picé cuntra le cil y cuntra tè;
i ne sun nia plü dëgn de ester to fi.



La figöra che nes dá le plü da ponsé te chësta parabola é le fi plü vedl.

*Nia ma ciodich'al n'é nia bun da pordené,
nia ma ciodich'al n'é nia bun da partí la ligrëza,
mo ciodich'al ne se vëga nia y n'é nia bun da tó.*

*Al ne ti consënt nia a so fre plü jonn l'acoliënza cordiala de so pere
y la pordenanza incondizionada, deach'al ne se consënt nia a se instës.
Al baudia pro so pere ch'al á tut ia le miü videl por so fre che á desmazé döt,
deperpo che por él, che laora y stracia, n'él gnanca n bëch dessurora.
Cun so ce dür se stál instës te tru. Deach'al ne se consënt nia a se instës,
ne sciafia gnanca le pere da ester generus impara.*

Insciö sunse ince nos datrai:

*Ne ester nia bugn da ti pordené ai atri, deach'i ne tignun instësc nia cunt
dla misericordia de Dî.*

*Chël che vëiga te súa vita ma n'ademplimënt sciode de dovëis,
stentará da ti scinché y consintí ligrëza ai atri.*

Forsc nes dëida chësta parabola da capí che Chël Bel Dî ó jënt de cör.

	SAN MARTIN		LUNGIARÜ
06.03.16 4^a DOMËNIA DE CARSËMA C	9.00 Staziuns 9.30 Gran Mëssa por la comunité <i>Oferta por Kassian-Tschiederer-Werk</i> 11.00 Bato de Simon Dapoz y Victoria Zaira Schanung	06.03.16 Domënia	7.55 Staziuns 8.15 Gran Mëssa por la comunité <i>Oferta por Kassian-Tschiederer-Werk</i>
07.03.16 Lönesc <i>Perpetua y Felizita</i>	19.30 Incuntada cun pater Jan Matik da Oies sura le vangele dl Pere Misericordius te n cërtil dla bibla	07.03.16 Lönesc	17.00 Les Staziuns
08.03.16 Dedolönesc <i>Jan de Dî, Michil</i>	19.30 Mëssa + Bino Pedevilla + Doro Verginer	08.03.16 Mertesc	7.30 Zelebraziun dla Parora de Dî
09.03.16 Dedemesaledema <i>Bruno, Franzisca</i>	19.30 Les Staziuns	09.03.16 Mercui	7.30 Mëssa fam. Sepl Clara, Somví + + Tarejia y Pasquale Wieser + Franz Pezzei, Ghestan 14.30 Confesciuns di scolars (elementara y mesana) 15.30 Vijita ales families da Frëina
10.03.16 Jöbia <i>Gustaf, Milio</i>	7.30 Mëssa + Mariangel Tavella + Paul Vantsch + + Castlunger, Roder Corona por vocaziuns Comuniun ai amará 14.30 Confesciuns di scolars dla mesana	10.03.16 Jöbia	
11.03.16 Vëndres <i>Rosina, Ulrich</i>	14.00 Vijita ales families da Mirí y Sorega 19.30 Staziuns cun i jogn (cor di jogn) Düc é invιά	11.03.16 Vëndres	7.30 Mëssa fam. Planatscher + Maria Greif + Ivo Sorá
12.03.16 Sabeda <i>Gregor, Max</i>	15.30 Mëssa tla Ciasa de Palsa 18.30 Mëssa prefestia por familia de Pepi Dejacó + Cristina Conrater + Linda Mühlmann	12.03.16 Sabeda	20.00 Mëssa prefestia dl ann + Magdalena Flatscher dl ann + + Herta y Giovanni Clara + siur Heinrich
13.03.16 5^a DOMËNIA DE CARSËMA C	9.00 Staziuns 9.30 Gran Mëssa por la comunité 11.00 Bato de Mattia Rigato	13.03.16 Domënia	7.55 Staziuns 8.15 Gran Mëssa por la comunité